

摘藻堂四庫全書薈要

史部

欽定四庫全書薈要卷六千二百十八

遼史卷九十四

元中書右丞相總裁托克托等修

列傳第二十四

耶律華格

耶律幹拉

耶律蘇色

蕭阿魯忒

耶律納延

耶律和囉木薩噶

耶律世良

耶律華格字弘隱孟父楚國王之後善騎射乾亨初為

北院林牙統和四年南侵宋華格擒謀者知敵由海路
來襲即先據平州要地事平拜上京留守遷北院大王
十六年復侵宋為先鋒破敵于遂城以功遷南院大王
尋改北院樞密使開泰元年伐準布準布棄輜重遁走
俘獲甚多帝嘉之封幽王後邊吏奏自華格還闕糧乏
馬弱勢不可守上復遣華格經畧西境華格與邊將深
入聞蕃部逆命居伊濟水華格徐以兵進敵望風奔潰
獲羊馬及輜重路由白拔烈遇阿爾斯蘭回鶻掠之都

監紐幹哩謂華格曰君誤矣此部實効順者華格悉還
所俘諸蕃由此不附上使案之削王爵以侍中遙領大
同軍節度使卒

耶律幹拉字斯寧奚德呼勒人趨捷有力善騎射保寧
初補護衛車駕獵頡山適豪猪伏叢莽帝射中猪突出
御者圖們捨轡而避廐人鶴骨翼之幹拉復射而斃帝
嘉賞及獵赤山適奔鹿奮角突前路隘不容避垂犯蹕
幹拉以身當之鹿觸而顛帝謂曰朕因獵兩瀕于危賴

卿以免始見爾心遷護衛太保從樞密使耶律色珍破
宋將楊繼業軍于山西統和十三年秋為行軍都監從
都部署奚王和碩鼎伐烏舍烏哲圖數月至其城烏哲
圖請降和碩鼎利其俘掠令四面急攻烏哲圖死守隨
方捍禦依埤堦虛構戰棚誘我軍登陴俄撤枝柱登者
盡覆和碩鼎知不能下欲退蕭恒德謂師久無功何以
藉口若深入大掠猶勝空返幹拉曰深入恐所得不償
所損恒德不從略地東南循高麗北鄙還道遠糧絕人

馬多死詔奪諸將官惟幹拉以前議得免尋加同政事
門下平章事為東京留守開泰中卒

耶律蘇色字阿敏性忠直簡毅練武事應歷初為侍從
累遷圖魯卜部節度使歷霸濟祥順聖五州都總管俄
為敦睦宮太師保寧三年改九部都詳衮四年伐党項
屢立戰功手詔勞之統和初皇太后稱制西邊甫定蘇
色務安集諸蕃利害輒具以聞太后益信任之凡臨戎
與士卒同甘苦所獲均賜將校賞順討逆威信大振在

邊二十年卒

蕭阿魯岱字伊實音威部人父農古仕至紉詳衮阿魯
岱習騎射曉兵法清寧間始仕累遷本部司徒改烏爾
台德呼勒統軍都監大安七年遷山北副部署九年達
勒達博索摩二部來侵率兵擊却之達勒達復劫牛羊
去阿魯岱引兵追及盡獲所掠斬渠帥數人是冬達勒
達等以三百餘人梗邊復戰却之斬首二百餘級加金
吾衛上將軍封蘭陵縣公壽隆元年第功加同中書門

下平章事進爵郡公改西北路招討使乾統三年坐留
宋俘當遣還者為奴免官後被徵以老疾致仕卒

耶律納延字移斯輦額爾奇木博果濟後父幹常為北
克從伐夏戰歿季父卓克算為宿直官累遷至北面林
牙咸雍四年拜北院大王改西南面招討使太康中西
北諸部擾邊議欲往討帝以為非卓克算不可遂拜西北
路招討使兼行軍都統平之以功復為北院大王納延
敦厚才敏上以其父幹死王事九歲加諸衛小將軍為

題里司徒尋召為宿直官太康三年為約尼剋大安九年為倒塌嶺節度使明年冬以北準布長磨古斯叛與招討都監耶律呼哩率精騎往討破之納延薦呼哩為漢人行宮副部署壽隆初復討達勒達博索摩等有功賜詔褒美改烏爾古德呼勒統軍使邊境以寧部民乞留詔許再任乾統六年拜中京留守改北院大王薨納延為人廉介長于理民每有鬪訟親覈曲直不尚威嚴常曰凡治人本欲分別是非何事迫脅以立名故所至

以惠化稱

耶律和羅木薩噶字烏庫哩孟父房之後重熙末補祇
候郎君清寧初加安州團練使太康中歷懷德軍節度
使奚六部圖哩太尉詔與樞密官措畫東北邊事改左
護衛太保侍上言多率易察其無他故上優貸之八年
知西北路招討使事時邊部尼都格爾等來侵和囉木
薩噶誘北準布酋豪磨古斯攻之俘獲甚衆加左僕射
復討巴都格爾等誤擊磨古斯北準布由是叛命遣都

監張九討之不克二室韋與六院部特們羣牧宮分等
軍陷于敵和囉木薩噶不以實聞遂削官決大杖壽隆
間累遷特哩衮兼侍中賜保節功臣道宗崩與宰相耶
律儼總山陵事乾統中致仕卒

耶律世良小字幹六院部人才敏給練達國朝典故及
世譜上書與族弟迪里爭嫡庶帝始識之時北院樞密
使韓德讓病帝問孰可代卿德讓曰世良可北院大王
耶律舒魯復問北院之選德讓曰無出世良統和末為

北院大王開泰初因大冊禮加檢校太尉同政事門下
平章事時邊部拒命詔北院樞密使耶律華格將兵以
世良為都監往禦之明年華格還將罷兵世良上書曰
華格以為無事而還不思師老糧乏敵人已去焉能久
守若益兵可克也帝即命華格益兵與世良追之至安
真河大破而還自是邊境以寧以功王岐拜北院樞密
使三年命選馬駝于烏爾古會德呼勒部人伊喇殺其
酋長刷而叛鄰部皆應攻陷巨穆古城世良率兵壓境

遣人招之降數部各復故地四年伐高麗為副部署都
統劉慎行逗遛失期執還京師世良獨進兵明年至北
都護府破追兵于郭州以暴疾卒

論曰大之懷小也以德制之也以威德不足懷威不足
制而欲服人也難矣華格利俘獲而諸番不附和囉木
薩噶誤擊磨古斯而準布叛命皆喜于一旦之功而不
圖後日之患庸何議焉若幹拉之戒深入蘇色之務安
集亦鐵中之錚錚者邪

遼史卷九十四考證

耶律和囉木薩噶傳

按和囉木薩噶於壽隆間為東

京留守乾統三年為南院大王詳宏簡錄傳未載

遼史卷九十四考證

欽定四庫全書薈要卷六千二百十九

遼史卷九十五

元中書右丞相總裁托克托等修

列傳第二十五

耶律鴻觀

耶律瑪魯

蕭迪里

耶律達魯

耶律辰嘉努

耶律特默

耶律仙童

蕭索颯

耶律大悲努

耶律鴻觀字和多沁樞密使華格之弟統和間累遷順

義軍節度使入為北面林牙太平元年加同政事門下
平章事為彰國軍節度使兼山北道兵馬都部署徙武
定軍節度使拜特哩袞六年討準布有功聖宗嘗刺臂
血與鴻觀盟為友禮遇尤異拜南府宰相改上京留守
重熙六年遷南院大王御製誥辭以寵之十三年加裕
悅帝憫其勞復授武定軍節度使卒訃聞上哭曰惜哉
善人喪至親臨奠焉

耶律瑪魯字揚隱孟父楚國王之後性寬和善諧謔親

朋會遇一坐盡傾恬于榮利與耶律鴻觀為刺血友鴻
觀為特哩袞補宿直官重熙初遷旗鼓伊喇詳袞為人
畏慎容物或有面相陵折者恬然若弗聞不臧否世務
以故上益親狎三年遷崇德宮使為特哩袞御製誥辭
褒之拜北院宣徽使寵過過宰輔帝嘗以兄呼之改遼
興軍節度使卒年七十子努克特終南京宣徽使

蕭迪里字國寧約尼森濟汗宮人重熙初遙攝鎮國軍
節度使六年奉詔使宋傷足而跛不告遂行帝怒及還

決以大杖降同簽南京留守事遙授靜江軍節度使歷
羣牧都林牙累遷右伊勒希巴以才幹見任使會車駕
西征元昊乞降帝以前後反覆遣迪里往覘誠否因為
元昊陳述禍福聽命乃還拜北院樞密副使出為中京
留守十九年改西京留守卒

耶律達魯字薩蘭清寧初為本班郎中補遷宿直官乾
統中從伐準布有功加奉宸歷護衛太保改弘義宮副
使時上京梟賊趙鍾格跋扈自肆達魯擒之加泰州觀

察使為達嚕噶部節度使天慶中知興中府加金吾衛
上將軍為盜所殺

耶律辰嘉努字綿辛懿祖弟噶拉之八世孫重熙中補
牌印郎君坐直日不至降本班會帝獵辰嘉努逐鹿圍
內鞭之二百時耶律仁先薦辰嘉努健捷比海東青鶻
授御蓋郎君歷鷹坊尚廐四方館副使改圖嚕庫皮室
詳袞會太后生辰進詩獻馴鹿太后嘉獎賜珠二琲雜
綵二百段兄薩巴卒辰嘉努聞訃不告而去帝怒鞭之

清寧初累遷右伊勒希巴適帝與燕國王射鹿俱中王時九歲帝悅辰嘉努應制進詩帝喜解衣以賜後皇太子廢帝疑辰嘉努黨附罷之時西北諸部寇邊以辰嘉努為烏爾古節度使行軍都監賜甲一屬馬二疋討諸部擒其酋送於朝偵候者見馬蹤意寇至辰嘉努遣報元帥耶律愛努視之曰此野馬也將出獵賊至愛努戰歿有司詰案辰嘉努不伏詔釋之由是感激每事竭力後諸部復來侵辰嘉努率兵三往皆克邊境遂寧以老

告歸不從道宗崩為山陵使致仕年八十卒

耶律特默李父房之後重熙間為北剋累遷六部圖哩
太尉大安四年為倒塌嶺節度使頃之為禁軍都監是
冬討磨古斯斬首二千餘級十年復討之既捷授南院
宣徽使壽隆元年為北院大王四年知黃龍府事薨
耶律仙童仲父房之後重熙初為宿直官累遷特哩袞
都監以寬厚稱富珠哩叛仙童為五國節度使率師討
之擒其帥托多羅又擊威叛降其衆改彰國軍節度使

拜北院大王清寧二年知黃龍府事遷侍衛親軍馬步軍都指揮歷忠順武定二軍節度使致仕封蔣國公咸雍初徙封許國卒

蕭素颯字特默五院部人重熙間始仕累遷北院承旨彰愍宮使清寧初歷左皮室詳袞右伊勒希巴咸雍五年博和哩叛素颯降之率其酋長來朝帝嘉其功徙北院林牙改南院副部署卒子穆喇幹字和琳補伊勒希巴郎君遷文班太保太康中改南京統軍使為右伊勒

希巴與樞密使耶律阿蘇論事不合見忌出為馬羣太保北部來侵穆喇幹破之遷同知烏爾古德呼勒統軍仍許便宜行事後以讒毀降領西北路戍軍復為馬羣太保卒

耶律大悲努字糾堅王子班尼魯古之後太康中歷永興建昌宮使右皮室詳袞會準布叛奉詔招討之壽隆初拜殿前都點檢乾統初歷上京留守特哩袞復為都點檢改西南面招討使請老不許天慶中留守上京領

北南樞密院點檢中丞諸司等事以彰國軍節度使致仕卒大悲努舉止馴雅好禮儀為時人所稱

論曰遼自神冊而降席富彊之勢內修法度外事征伐一時將帥震揚威靈風行電埽討西夏征党項破準布平德呼勒諸部震懾闐鞬鼓而膽落股弁可謂雄武之國矣其戰勝攻取必有奇謀秘計神變莫測者將前史所載不足以發之邪抑天之所授衆莫與爭而能然耶雖然兵者凶器可戢而不可玩爭者末節可遏而不可

召此黃石公所謂柔能制剛弱能制彊也又況乎仁者
之無敵哉遼之君臣智足守此金人果能乘其敝而躡
其後乎是以於耶律鴻觀輩諸將不能無慨然也

遼史卷九十五

遼史卷九十五考證

耶律鴻觀傳十三年加裕悅

按興宗本紀重熙十二

年八月庚申裕悅耶律鴻觀薨是鴻觀之加裕悅尚在重熙十二年之前也傳作十三年加裕悅與紀互異

遼史卷九十五考證

欽定四庫全書蒼要卷六千二百二十一

遼史卷九十六

元中書右丞相總裁托克托等修

列傳第二十六

耶律仁先

托卜嘉

耶律良

蕭罕嘉努

蕭德

蕭惟信

蕭約音努

耶律廸里

姚景行

耶律阿蘓

耶律仁先字紉鄰小字扎拉孟父房之後父貴音南府

宰相封燕王仁先魁偉爽秀有智略重熙三年補護衛
帝與論政才之仁先以不世遇言無所隱授宿直將軍
累遷殿前副點檢改和拉唐古部節度使俄召為北面
林牙十一年陞北院樞密副使時宋請增歲幣銀絹以
償十縣地產仁先與劉六符使宋仍議書貢宋難之仁
先曰曩者石晉報德本朝割地以獻周人攘而取之是
非利害灼然可見宋無辭以對乃定議增銀絹十萬兩
匹仍稱貢既還同知南京留守事十三年伐夏留仁先

鎮邊未幾召為契丹行宮都部署奏復王子班郎君及諸宮雜役十六年遷北院大王奏今兩院戶口殷庶乞免他部助役從之十八年再舉伐夏仁先與皇太弟重元為前鋒蕭惠失利于河南帝猶欲進兵仁先力諫乃止後知北院樞密使遷東京留守女直恃險侵掠不止仁先乞開山通道以控制之邊民安業封吳王清寧初為南院樞密使以耶律華格譖出為南京兵馬副元帥守太尉更王隋六年復為北院大王民歡迎數百里如

見父兄時北南院樞密尼嚕古蕭呼都克等忌之請以仁先為西北路招討使耶律伊遜奏曰仁先舊臣德冠一時不宜補外復拜南院樞密使更王許七月上獵太子山耶律良奏重元謀逆帝召仁先語之仁先曰此曹兇狠臣固疑之久矣帝趣仁先捕之仁先出且曰陛下宜謹為之備未及介馬重元犯帷宮帝欲幸北南院仁先曰陛下若舍扈從而行賊必躡其後且南北大王心未可知仁先子托卜嘉曰聖意豈可違乎仁先怒擊其

首帝悟悉委仁先以討賊事乃環車為營折行馬作兵
仗率官屬近侍三十餘騎陣抵桓外及交戰賊衆多降
尼嚕古中矢墮馬擒之重元被傷而退仁先以五院部
蕭塔喇所居最近亟召之分遣人集諸軍黎明重元率
奚人二千犯行宮蕭塔喇兵適至仁先料賊勢不能久
俟其氣沮攻之乃背營而陣乘便奮擊賊衆奔潰追殺
二十餘里重元與數騎遁去帝執仁先手曰平亂皆卿
之功也加尚父進封宋王為北院樞密使親製文以褒

之詔畫灤河戰圖以旌其功咸雍元年加裕悅改封遼王與耶律伊遜共知北院樞密事伊遜恃寵不法仁先抑之由是見忌出為南京留守改王晉恤孤憚禁姦慝宋聞風震服議者以為自裕悅休格之後惟仁先一人而已準布達爾罕叛命仁先為西北路招討使錫鷹紐印及劔上諭曰卿去朝廷遠每俟奏行恐失機會可便宜從事仁先嚴斥埃扼敵衝懷柔服從庶事整飭達爾罕復來寇仁先逆擊追殺八十餘里大軍繼至又敗之

巴爾斯土默特等部來救見其屢挫不敢戰而降北邊
遂安八年卒年六十遺命家人薄葬弟義先信先俱有
傳子托卜嘉

托卜嘉字和多沁清寧二年補祗候郎君累遷永興宮
使以平重元之亂遙授忠正軍節度使賜定亂功臣同
知殿前點檢司事歷高陽臨海二軍節度使左皮室詳
袞太康六年授西北路招討使率諸部酋長入朝加兼
侍中自蕭達魯為招討之後朝廷務姑息多擇柔愿者

用之諸部漸至跋扈托卜嘉含容尤甚邊防益廢尋改西南面招討使準布酋長磨古斯來侵西北路招討使和囉木薩噶戰不利詔托卜嘉代之磨古斯為酋長由托卜嘉所薦至是遣人誘致之磨古斯始降托卜嘉逆于鎮州西南沙磧間禁士卒無得妄動敵至裨將耶律烏蘇徐烈見其勢銳不及戰而走遂被害年五十八贈侍中諡曰貞憫托卜嘉少謹愿後為族嫠婦所惑出其妻終以無子人以此譏之

耶律良字錫納小字蘇著帳郎君之後生於乾州讀書
醫巫閭山學既博將入南山肄業友人止之曰爾無僕
御驅馳千里縱聞見過人年亦垂暮今若即仕已有餘
地良曰窮通命也非爾所知不聽留數年而歸重熙中
補寢殿小底尋為燕趙國王近侍以家貧詔乘廐馬遷
修起居注會獵秋山良進秋游賦上嘉之清寧中上幸
鴨子河作捕魚賦由是寵遇稍隆遷知制誥兼知部署
司事奏請編御製詩文目曰清寧集上命良詩為慶會

集親製其序頌之為敦睦宮使兼權知皇太后宮諸局
事良聞重元與子尼嚕古謀亂以帝篤於親愛不敢遽
奏密言於皇太后太后託疾召帝白其事帝謂良曰汝
欲間我骨肉耶良奏曰臣若妄言甘伏斧鑕陛下不早
備恐墮賊計如召尼嚕古不來可卜其事帝從其言使
者及門尼嚕古意欲害之羈於帳下使者以佩刀斷帝
而出馳至行宮以狀聞帝始信亂平以功遷漢人行宮
都部署咸雍初同知南院樞密使事為特哩袞出知中

京留守事尋卒帝嗟悼遣重臣賻祭給葬具追封遼西
郡王謚曰忠成

蕭韓家努字括寧奚長渤海魯思之後性孝友太平中補
祇候郎君累遷敦睦宮使伐夏為左翼都監遷北面林
牙俄為南面副部署賜玉帶改奚六部大王治有聲清
寧初封韓國公歷南京統軍使北院宣徽使封蘭陵郡
王九年以上獵太子山聞重元亂馳詣行在帝倉卒欲避
于北南大王院與耶律仁先執轡固諫乃止明日重元

復誘奚獵夫來韓家努獨出諭之曰汝曹去順效逆徒
取族滅何苦悔過轉禍為福獵夫投仗首服以功遷殿
前都點檢封荊王賜資忠保義奉國謁貞平亂功臣咸
雍二年遷西南面招討使太康初徙王吳賜白海東青
鶻皇太子為乙辛所構幽于上京韓家努上書力言其
冤不報四年復為西南面招討使例削一字王爵改王
蘭陵薨子楊九終右祗候郎君班祥穩贈同中書門下
平章事

蕭德字特末隱楮特部人性和易篤學好禮法太平中
領牌印直宿累遷北院樞密副使敷奏詳明多稱上旨
詔與林牙耶律庶成修律令改契丹行宮都部署賜官
戶十有五清寧元年遷同知北院樞密使封魯國公
上以德為先朝眷遇拜南府宰相五年轉南京統軍使九
年復為南府宰相重元之亂摧鋒力戰斬尼嚕古首以
獻論功封漢王咸雍初以告老歸優詔不許久之加尚
父致仕卒七十二

蕭惟信字伊聶卓特部人五世祖錫蘭南府宰相曾祖
烏爾古中書令祖阿固齊知平州父果巴多智數博覽
古今開泰初為北院承旨遷右伊勒希巴以幹敏稱拜
南府宰相累遷倒塌嶺節度使知興中府復為右伊勒
希巴琳沁作亂事覺果巴按之止誅首惡餘並釋之歸
奏稱旨惟信資沈毅篤志于學能辨論重熙初始仕累
遷左中丞十五年徙燕趙國王傳帝諭之曰燕趙左右
多面諛不聞忠言浸以成性汝當以道規誨使知君父

之義有不可處王邸者以名聞惟信輔導以禮十七年
遷北院樞密副使坐事免官尋復職兼北面林牙清寧
九年重元作亂犯灤河行宮惟信從耶律仁先破之賜
竭忠定亂功臣歷南京留守左右伊勒希巴復為北院
樞密副使太原中以老乞歸不聽樞密使耶律伊遜譖
廢太子中外知其冤無敢言者惟信數廷爭不得復告
老加守司徒卒

蕭約音努字布當奚六部詳袞圖魯卜六世孫父巴爾

三歲居父母喪毀瘠過甚養于家奴錫喇布重熙初興宗獵奚山過巴爾所居錫喇布言于近臣巴爾得見上時年甫十歲氣象已如成人帝悅之錫賚甚厚既長有遠志不樂仕進隱于奚王嶺之察克谷上以其名家又有時譽就拜舍哩軍詳袞約音努貌偉言辨通遼漢文字善騎射擊鞠所交皆一時名士年四十始為護衛平重元之亂以功遷護衛太保改本部南尅俄為旗鼓伊喇詳袞監障海東青鶻獲白花者十三賜楫拙犀并玉

吐鵬拜五蕃部節度使卒子陽阿有傳

耶律迪里字薩蘭採訪使厚五世孫寬厚好學工文詞
重熙末補牌印郎君兼知起居注清寧元年稍遷同知
永州事禁盜有功改北面林牙承旨九年重元作亂迪
里赴援力戰平之遙授臨海軍節度使十年徙武安州
觀察使咸雍五年累遷長寧宮使檢括戶部司乾州錢
帛逋負立出納經畫法公私便之太康四年為南院大
王秩滿部民請留同知南京留守事有疾上命乘傳赴

闕遣太醫視之遷上京大安中改塔布城節度使以疾致仕加兼侍中賜一品俸八年卒

姚景行始名景禧祖漢英本周將應歷初來聘用敵國禮帝怒留之隸漢人宮分及景行既貴始出籍貫興中縣景行博學重熙五年擢進士乙科為將作監改燕趙國王教授不數年至翰林學士樞密副使叅知政事性敦厚廉直人望歸之道宗即位多被顧問為北府宰相九年秋告歸道聞重元亂收集行旅得三百餘騎勤王

比至賊已平帝嘉其忠賜以逆人財產咸雍元年出為
武定軍節度使明年驛召拜南院樞密使上從容問治
道引入內殿出御書及太子書示之賜什器車仗帝有
意伐宋召景行問曰宋人好生邊事如何對曰自聖宗
皇帝以威德懷遠宋修職貢迄今幾六十年若以細故
用兵恐違先帝成約上然其言而止致仕不踰月復舊
職丁家艱起復兼中書令上問古今儒仕優劣占對稱
旨知興中府改朔方軍節度使太康初徙鎮遼興以上

京多滯獄命為留守不數月以獄空聞累乞政仕不從
復請許之加守太師卒遣使弔祭進封柳城郡王謚文
憲壽隆五年詔為立祠

耶律阿思字散班清寧初補祗候郎君以善射掌獵事
進渤海近侍詳袞重元之亂與護衛蘇射殺湟魯古賜
號靖難功臣徙契丹行宮都部署大安初為北院大王
封漆水郡王十一年為北院樞使監修國史道宗崩受
顧命加于越錄乙辛黨人罪重者當籍其家阿思受賄

多所寬貸蕭合魯嘗言當修邊備阿思力沮其事或
譏其以金賣國後以風疾失音致仕加尚父封趙王薨
年八十追封齊國王

論曰灤河之變重元擁兵行幄微仁先等道宗其危乎
當其止幸北南院召塔喇兵以靖大難功宜居首良以
反謀白太后罕嘉努以逆順降奚人德與阿蘇殺兄嚕
古皆有討賊之力焉仁先齊名休格勲德兼備此其一
節歟

遼史卷九十六

遼史卷九十六考證

耶律仁先傳同知東京留守事十六年遷北院大王

按興宗本紀重熙十二年仁先以北院樞密副使同知東京留守事傳作南京互異又十五年自契丹行宮都部署為南院大王十九年自南院大王知北院樞密使事是仁先未嘗為北院大王此以南院為北院又以十五年為十六年也

耶律仁先傳清寧初為南院樞密使以耶律華格譖出

為南京兵馬副元帥 按道宗本紀清寧二年仁先
為南院樞密使四年六月為北院樞密使十一月出
為南京兵馬副元帥是仁先之出為南京兵馬副元
帥係為北院樞密使時非為南院樞密使時也

欽定四庫全書蒼要卷六千二百二十一

遼史卷九十七

元中書右丞相總裁托克托等修

列傳第二十七

耶律額特埒 哈里 竇景庸

耶律音濟 楊 績 趙 徽

王 觀 耶律吉遜

耶律額特埒字伊實音許國王伊德實六世孫少不喜

官祿年四十一始補本班郎君時樞密使耶律伊遜擅權讒害忠良額特埒恐禍及深自抑畏太康中為宿直官歷左右護衛太保大安初升燕王傅徙左伊勒希巴四年改北院樞密副使帝賜詩褒之遷知北院樞密使事賜翼聖佐義功臣北準布酋長磨古斯叛額特埒率兵進討會天大雪敗磨古斯四別部斬首千餘級拜西北路招討使封漆水郡王加賜宣力守正功臣尋拜南府宰相復討扎古呼喇巴部破之召為契丹行宮都部

署先是北南府有訟各州府得就按之比歲非奉樞密
檄不得鞠問以故訟者稽留額特埒奏請如舊從之五
年復為西北路招討使討尼都格爾俘斬甚衆獲馬駝
牛羊各數萬明年擒磨古斯加守太保賜奉國匡化功
臣乾統初乞致仕不許止罷招討南院樞密使封混同
郡王遷北院樞密使加守太師賜推誠贊治功臣致仕薨
諡曰敬肅

哈里字呼紐回鶻人其先在太祖時來貢願留因任用

之哈里重熙間歷近侍長清寧九年討重元之亂有功
加金吾衛上將軍賜平亂功臣累遷殿前都點檢以宿
衛嚴肅稱太康初加守太子太保二年加同中書門下
平章事三年改同知南院宣徽使事會耶律伊遜出守
中京哈里入賀及議復召陳其不可後伊遜再入樞府
出哈里為廣利軍節度使及皇太子被誣哈里當連坐
詔勿問大安初歷丕勤達魯噶部節度使壽隆五年有
疾自言吾數已盡却醫藥卒年七十七哈里素信浮圖

清寧初從上獵墮馬憤而復蘇言始見二人引至一城
宮室宏敞有衣絳袍人坐殿上左右列侍導哈里升階
持牘者示之曰本取大腹古裕誤執汝牘上書官至使
相壽七十七須臾還擠之大壑而寤道宗聞之命書其
事後皆驗

竇景庸中京人中書令振之子聰敏好學清寧中第進
士授秘書省校書郎累遷少府少監咸雍六年授樞密
直學士尋知漢人行宮副部署事大安初遷南院樞密

副使監修國史知樞密院事賜同德功臣封陳國公有疾表請致仕不從加太子太保授武定軍節度使審決寃滯輕重得宜以獄空聞七年拜中京留守九年薨諡曰肅憲子瑜三司副使

耶律音濟字阿古丕勒部人父雙寬鎮西邊二十餘年治嚴肅不殖貨利時多稱之音濟寅畏好義以廕補官累遷東京副留守北樞密院侍御時蕭格蕭國古辭等以佞見任鬻爵納賄音濟以直道處其間無所阿唯改

客省使時朝廷遣使括三京隱戶不得以音濟代之得
數千餘戶時昭懷太子知北南院事選音濟為輔導樞
密使伊遜將傾太子惡音濟在側奏出之為羣牧林牙
太康元年伊遜請賜牧地音濟奏曰今牧地徧隘畜不
蕃息豈可分賜臣下帝乃止伊遜由是益嫉之除懷德
軍節度使徙漠北猾水馬羣太保卒

楊績良鄉人太平十一年進士及第累遷南院樞密副
使與杜防韓和白等擅給進士堂帖降長寧軍節度使

徙知涿州清寧初拜參知政事兼同知樞密院事為南
府宰相九年聞重元亂與姚景行勤王上嘉之十年知
興中府咸雍初入知樞密院事二年乞致仕不許拜南
院樞密使帝以績舊臣特詔燕見論古今治亂人臣邪
正帝曰方今羣臣忠直耶律玦劉伸而已然伸不及玦
之剛介績拜賀曰何代無賢世亂則獨善其身主聖則
兼濟天下陛下銖分邪正升黜分明天下幸甚累表告
歸不許封趙王太康中以例改王遼西致仕加守太保

堯子貴中知興中府事

趙徽南京人重熙五年擢甲科累遷大理正清寧二年
銅州人妄毀三教徽按鞫之以狀聞稱旨歷煩劇有能
名累遷翰林學士承旨咸雍初為度支使三年拜叅知
政事出為武定軍節度使及代軍民請留後同知樞密
院事兼南府宰相門下侍郎平章事致仕卒追贈中書
令謚文憲

王觀南京人博學有才辯重熙七年中進士乙科興宗

崩克夏國報哀使還除給事中咸雍初遷翰林學士五年兼乾文閣學士七年改南院樞密副使賜國姓叅知政事兼知南院樞密事坐矯制修私第削爵為民卒

耶律喜孫字盈德永興宮分人興宗在青宮嘗居左右輔導聖宗大漸喜孫與馮嘉努告仁德皇后同宰相蕭浞卜等謀逆事及欽哀為皇太后稱制喜孫尤見寵任重熙中其子湟哥為近侍坐事伏誅帝以喜孫有翼戴功且悼其子罪死欲世其官喜孫無所出之部因見馬

印文有品部號使隸其部拜南府宰相尋出為東北路
詳衮卒

論曰喀里音濟之為臣也當伊遜擅權蕭格貪黷之日
雖與同官而能以正自處不少阿唯其過人遠矣傳曰
歲寒知松柏之後凋二子有焉若額特埒之戰功實景
庸之讞獄楊績之忠言亦賢矣夫

遼史卷九十七

遼史卷九十七考證

耶律額特埒傳五年復為西北路招討使討尼都格爾
部俘斬其衆 按部族表額特埒之奏尼都格爾之
捷在壽隆元年其出師則在大安十年與本紀合此繫
於大安五年之後不別書年月殊未明晰姑仍其舊
而訂正之

遼史卷九十七考證

欽定四庫全書薈要卷六千二百二十三

遼史卷九十八

元中書右丞相總裁托克托等修

列傳第二十八

蕭烏納 耶律儼 劉伸 耶律呼哩

蕭烏納一名托卜嘉字特默六院部人其先嘗為西南面伊喇烏納魁偉簡重善騎射清寧初兄托多以事入見帝問族人可用者托多以烏納對補祗候郎君遷近

侍敝史護衛太保太康初為北院宣徽使時伊遜已害
太子因言宋魏國王和羅噶之子淳可為儲嗣羣臣莫
敢言烏納及伊勒希巴蕭托輝諫曰舍嫡不立是以國
與人也帝猶豫不決五年帝出獵伊遜請留皇孫帝欲從
之烏納奏曰竊聞車駕出遊將留皇孫苟保護非人恐
有他變果留臣請侍左右帝乃悟命皇孫從行由此始
疑伊遜頃之同知南院樞密使事出伊遜淳等帝嘉其
忠封蘭陵郡王人謂近於古社稷臣授殿前都點檢

上謂王師儒耶律固等曰烏納忠純雖狄仁傑輔唐烏
哲立穆宗無以過也卿等宜達燕王知之自是令烏納
輔導燕王益見優寵大安初詔尚越國公主烏納固辭
改南院樞密使奏請掾史宜以歲月遷叙從之壽隆元
年拜北府宰相初天祚在潛邸烏納數以直言忤旨及
嗣位出為遼興軍節度使守太傅以佛殿小底王華誣
烏納借內府犀角詔鞠之烏納奏曰臣在先朝詔許日
取帑錢十萬為私費臣未嘗妄取一錢肯借犀角乎天

祚愈怒奪太傅官降寧邊州刺史尋改臨海軍節度使
烏納上書曰自蕭哈里亡入女直彼有輕朝廷心宜益
兵以備不虞不報天慶元年知黃龍府事改東北路統
軍使復上書曰臣治與女直接境觀其所為其志非小
宜先其未發舉兵圖之章數上皆不聽及金兵來侵戰
于寧江州其孫伊德濟死之烏納退走入城留官屬守
禦自以三百騎渡混同江而西城遂陷後與蕭迪里拒
金兵于長灤以軍敗免官五年天祚親征烏納殿復敗

績後數日乃與百官入見授上京留守六年耶律章努
叛來攻京城烏納發府庫以資士卒諭以逆順完城池
以死拒戰章努無所得而去授副元帥尋為契丹行宮
都部署事天祚以烏納先朝重臣有定策勲每問以政
烏納對甚切上雖優容終不能用以疾卒年七十

耶律儼字若思析津人本姓李氏父仲禧重熙中始仕
清寧初同知南院宣徽使事四年城鴨子混同二水間
拜北院宣徽使咸雍初坐誤奏事出為榆州刺史俄詔

復舊職遷漢人行宮都部署六年賜國姓封韓國公改

南院樞密使時樞臣伊遜等誣陷皇太子詔仲禧偕伊

遜鞠之蔓引無辜未嘗雪正伊遜薦仲禧可任拜廣德

軍節度使復為南院樞密使卒諡欽惠儼儀觀秀整好

學有詩名登咸雍進士第守著作佐郎補中書省令史

以勤敏稱太康初歷都部署判官將作少監後兩府奏事

論羣臣優劣唯稱儼才俊改少府少監知大理正賜紫

六年遷大理少卿奏讞詳平明年陞大理卿丁父憂奪

服同僉部署司事大安初為景州刺史繩胥徒禁豪猾
撫老恤貧未數月善政流播郡人刻石頌德二年改御
史中丞詔案上京滯獄多所平反同知宣徽院事提點大
理寺六年冬改山西路都轉運使剗剔垢弊奏定課額
益州縣俸給事皆施行壽隆初授樞密直學士以母憂
去官尋召復舊職宋攻夏李乾順遣使求和解帝命儼
如宋平之拜叅知政事六年駕幸駕鴛灤召至內殿訪
以政事帝晚年倦勤用人不能自擇令各擲骰子以采

勝者官之儼嘗得勝采上曰上相之徵也遷知樞密院
事賜經邦佐運功臣封越國公修皇朝實錄七十卷帝
大漸儼與北院樞密使阿蘇同受顧命乾統三年徙封
秦國六年封添水部王天慶中以疾命乘小車入朝疾
甚遣太醫視之薨贈尚父諡曰忠懿儼素廉潔一介不
取於人經籍一覽成誦然專務逢迎善伺人主意固結
上心他勿恤也由是權寵益固而人亦以是薄之有子
三處貞太常少卿處廉同知中京留守事處能少府少

監

劉伸字濟時宛平人少穎悟長以辭翰聞重熙五年登進士第歷彰武軍節度使掌書記大理正因奏獄上適與近臣語不顧伸進曰臣聞自古帝王必重民命願陛下省臣之奏上驚異擢樞密都承旨權中京副留守詔徙富民以實春泰二州伸以為不可奏罷之遷大理少卿人以不寃稱陞大理卿改西京副留守以父憂終制為三司副使加諫議大夫提點大理寺以伸明法而恕

案寃獄全活者衆徙南京副留守俄改崇義軍節度使
政務簡靜民用不擾致烏鵲同巢之異優詔褒之改戶
部使歲入羨餘錢三十萬緡拜南院樞密副使道宗嘗
謂大臣曰今之忠直耶律玠劉伸而已宰相楊績賀其
得人拜參知政事上諭之曰卿勿憚宰相時北院樞密
使伊遜勢熾方熾伸奏曰臣於伊遜尚不畏何宰相之
畏伊遜銜之相與排詆出為保靜軍節度使上終欲大
用加守太子太保遷上京留守伊遜以事徙鎮雄武復

以崇義軍節度使致仕適燕薊民饑伸與致仕趙徽韓
造日濟以糜粥所活不勝算大安二年卒上震悼賻贈
加等

耶律呼哩字蘇色宏義宮分人其先允佐太祖有功為
德呼勒額爾奇木父揚鄂特左監門衛大將軍呼哩謙
謹於人無適莫重熙末補寢殿小底以善職屢更華要
遷千牛衛大將軍大安中北準有酋穆爾薩叛為招討
都監與耶律納延率精騎二千討平之以功為漢人行

宮副部署兼知太和宮事致仕加同中書門下平章事
卒

論曰烏納當道宗昏惑之會擁佑皇孫使伊邇姦計不
獲復逞而遼祚以續比之烏哲立穆宗非溢美也儼以
俊才蒞政所至有能譽纂述遼史具一代治亂亦云勤
矣但其固寵不能以禮正家惜哉劉伸三為大理民無
冤抑一登戶部上下兼裕至與耶律玠並稱忠直不亦
宜乎

遼史卷九十八考證

蕭烏納傳尋為契丹行宮都部署 按原本作尋為契
丹都宮使考百官志無都宮使之名而本紀亦第載
烏納為契丹行宮都部署今據改

耶律儼傳有子三處鎮處廉處能 按處廉之廉原本
訛兼今據宏簡錄改

遼史卷九十八考證

欽定四庫全書

總校官原候補知府臣葉佩蓀

校對官編修臣吳錫麒

謄錄監生臣孫樹新

欽定四庫全書叢要

史部
遼史卷九十九至
一百十

詳校官祭酒臣韋謙恒



欽定四庫全書蒼要卷六千二百二十四

遼史卷九十九

元中書右丞相總裁托克托等修

傳第二十九

蕭巖壽

耶律薩喇

蕭蘇色

耶律托卜嘉

蕭托卜嘉

蕭和克

耶律實魯

蕭巖壽伊實部人性剛直尚氣仕重熙末道宗即位皇

太后屢稱其賢由是進用上出獵較巖壽典其事未嘗
高下于心帝益重之歷文班太保同知樞密院事成雍
四年從耶律仁先伐準布破之有詔留屯亡歸者衆由
是鑄兩官十年討德珣勒有功為其部節度使太康元
年同知南院宣徽使事遷北面林牙密奏伊遜以皇太
子知國政心不自安與張孝傑數相過從恐有陰謀動
搖太子上悟出伊遜為中京留守會伊遜生日上遣近
臣耶律拜薩巴賜物為壽伊遜因私屬白上臣見姦人

在朝陛下孤危身雖在外竊用寒心拜薩巴還以聞上遣人賜伊遜車諭曰無慮弗用行將召矣由是反疑巖壽出為順義軍節度使伊遜復入為樞密使流巖壽于威路終身拘作巖壽雖竄逐恒以社稷為已憂時人為之語曰以狼牧羊何能久長三年伊遜誣巖壽與謀廢立事執還殺之年四十九乾統間贈同中書門下平章事繪像宜福殿巖壽廉直面折廷評多與伊遜忤故及於難

耶律薩喇字董隱南院大王穆爾古之孫性忠直沉厚
清寧初累遷西南面招討使以治稱咸雍九年改北院
大王未幾為契丹行宮都部署太原二年耶律伊遜為
中京留守詔百官廷議欲復召之羣臣無敢正言薩喇
獨奏曰蕭巖壽言伊遜有罪不可為樞臣故陛下出之
今復召恐天下生疑進諫者三不納左右為之震悚伊
遜復為樞密使見薩喇讓曰與君無憾何獨異議薩喇
曰此社稷計何憾之有伊遜誣薩喇與蘇色同謀廢立

詔按無迹出為始平軍節度使及蕭額都溫誣首竟遣
使殺之乾統間追封漆水郡王繪像宜福殿仍追贈三
子官爵

蕭蘇色字圖勒錦圖魯卜部人性沉毅重熙間累遷右
護衛太保富珠哩叛從耶律義先往討執首亂托多羅
以歸清寧中歷北面林牙彰圖軍節度使入為北院樞
密副使咸雍十年經畧西南邊撤宋堡障戍以皮室軍
上嘉之太康二年知北院樞密使耶律伊遜權寵方盛

附麗者多至通顯蘇色未嘗造門伊邈銜之誣構蘇色
首謀廢立按之無驗出為上京留守伊邈復令蕭額都
溫以前事誣告上怒不復加訊遣使殺之時方盛暑尸諸
原野容色不變烏鵲不敢近乾統間追封蘭陵郡王繪
像宜福殿

耶律托卜嘉字薩巴系出季父房父果嘉仕至林牙重
熙間破夏人于金肅軍有功優加賞賚托卜嘉清寧中
補牌印郎君累遷永興宮使九年平重元之亂以功知

點檢司事賜平亂功臣為懷德軍節度使咸雍五年遷約尼剋太康三年授北院宣徽使耶律伊遜謀害太子托卜嘉知其姦欲殺伊遜及蕭德勒岱蕭錫沙等伊遜知之令其黨誣構托卜嘉與廢立事殺之乾統間追封漆水郡王繪像宜福殿

蕭托卜嘉字烏拉丹國舅郡王果濟之孫性剛直咸雍中補祗候郎君太康元年為彰愍宮使尚趙國公主拜駙馬都尉三年改同知漢人行宮都部署與北院宣徽

使耶律托卜嘉善伊遜嫉之令人誣告謀廢立事不勝
撈掠誣伏上引問昏瞶不能自陳遂見殺乾統間追封
蘭陵郡王繪像宜福殿

蕭和克字阿爾斯蘭性忠直趨捷有力補禁軍咸雍初
從招討使耶律卓克算討番部之違命者及請降來介
有能躍馳峯而上者以僂捷相詫卓克算問誰能此和
克被重鎧而出手不及峯一躍而上使者大駭卓克算
以女妻之帝聞召為護衛時北院樞密使耶律伊遜以

狡佞得幸肆行兇暴和克伏于橋下伺其過欲殺之俄以暴雨壞橋不果後又欲殺于獵所為親友所阻太康三年復欲殺伊遜及蕭德勒岱等伊遜知而械繫之考劾不服流于邊及太子廢徙于上京召和克至殺之乾統初追贈龍虎衛上將軍

耶律實魯字楚旺六院部人祖都丹南院大王父愛實統軍副使實魯性剛直有經世志始為牌印郎君太康初為伊勒希巴郎君時樞密使耶律伊遜誣殺皇后謀

廢太子斥忠賢進姦黨實魯惡所為伊邈覺之太子既
廢以實魯附太子流鎮州天祚即位召為御史中丞時
方治伊邈黨有司不以為意實魯上書曰臣前為姦臣
所陷斥竄邊郡幸蒙召用不敢隱默恩賞明則賢者勸
刑罰當則姦人消二者既舉天下不勞而治臣見耶律
伊邈身出寒微位居樞要竊權肆惡不勝名狀蔽先帝
之明誣陷順聖構害忠讜敗國罔上自古所無賴廟社
之休陛下獲纂成業積年之寃一旦洗雪正陛下英斷

克成孝道之秋如蕭德勃岱實伊遜之黨耶律赫魯亦
不為早辨賴陛下之明遂正其事臣見陛下多疑故有
司顧望不切推問伊遜在先帝朝權寵無比先帝若以
順考為實則伊遜為功臣陛下豈得立耶先帝黜逐嬖
后詔陛下在左右是亦悔前非也陛下詎可忘父讐不
報寬逆黨不誅今靈骨未獲而求之不切傳曰聖人之
德無加于孝昔唐德宗因亂失母思慕悲傷孝道益著
周公誅飛廉惡來天下大悅今逆黨未除大冤不報上

無以慰順考之靈下無以釋天下之憤怒氣上結水旱
為沴臣願陛下下明詔求順考之瘞所盡收逆黨以正
邦憲快四方忠義之心昭國家賞罰之用然後致治之
道可得而舉矣謹別錄順聖升遐及伊邈等事昧死以
聞書奏不報聞者莫不歎惋乾統中遙授靜江軍節度
使卒子瑪格同中書門下平章事

論曰易言履霜堅冰至謹始也使道宗能從巖壽薩喇
之諫后何得而誣太子何得而廢哉蘇色托卜嘉以忠

言見殺國欲無亂得乎實魯之書亦幸出於伊邈既敗
之後獲行其說有國家者可不知人哉

遼史卷九十九

遼史卷九十九考證

蕭巖壽傳出伊遜為中京留守 按中京原本作上京

考道宗本紀及伊遜傳俱作中京今據改

耶律薩喇傳咸雍九年改北院大王 按道宗本紀咸

雍九年十二月以南院宣徽使耶律薩喇為南院大

王傳稱北院大王既與紀異且不載其官宣徽使殊

畧

耶律托卜嘉傳欲殺伊遜及葉德勤岱等 按德勤岱

舊作得里特此處原本復作特里得今畫一改

遼史卷九十九考證

欽定四庫全書薈要卷六千二百二十五

遼史卷一百

元中書右丞相總裁托克托等修

列傳第三十

耶律唐古

蕭德勒岱

蕭綽哈

耶律章努

耶律珠展

耶律唐古字富僧額六院郎君噶拉之後太康中補本班郎君累遷至大將軍性坦率好別白黑人有不善必

盡言無隱時號強唐古在朝數論宰相得失由是久不
得調後出為西北戍長乾統三年蕭德勒岱為西北路
招討使以后族慢侮僚吏唐古不屈乃罷之唐古訟之
朝不省天慶初烏爾古德呼勒叛召拜烏爾古部節度
使至部諭降之遂出私財發富民積以振其困乏部民大
悅加鎮國上將軍蕭德勒岱以都統率兵與金人戰敗
績唐古請論軍法且曰臣雖老願為國破敵不納保大
元年乞致仕明年天祚出奔唐古謁於倒塌嶺為上流

涕上慰止之復拜烏爾古部節度使至部德呼勒五千人來攻唐古率家奴擊破之加太子太傅年七十二卒

蕭德勒岱字紇鄰晉王孝先之孫父薩巴歷官使相德勒岱短而僂外謹內倨太康中補祗候郎君稍遷興聖宮副使兼同知中丞司事大安中燕王妃生子德勒岱以妃叔故歷寧遠軍節度使長寧宮使壽隆二年監討達勒達博索摩二部多俘而還改同知南京留守事乾

統元年為北面林牙同知北院樞密事受詔與北院樞密使耶律阿蘇治伊遜餘黨阿蘇納賄多出其罪德勒岱不能制亦附會之四年知北院樞密事夏王李乾順為宋所攻遣使請和解詔德勒岱與南院樞密使牛溫舒使宋平之宋既許德勒岱受書之日乃曰始奉命取要約歸不見書辭豈敢徒還遂對宋主發函而讀既還朝議為是天慶三年加守司徒封蘭陵郡王女直初起廷臣多欲乘其未備舉兵往討德勒岱獨阻之以至敗

匈奴天祚以德勒岱不合人望出為西南面招討使八年
召為北院樞密使寵任彌篤是時諸路大亂飛章告急
者絡繹而至德勒岱不即上聞有功者亦無甄別由是
時校怨怒人無鬪志保大二年金兵至嶺東會耶律薩
巴習騎薩巴等謀立晉王額魯溫事世上召德勒岱議
曰反者必以此兒為名若不除去何以獲安德勒岱唯
唯竟無一言申理王既死人心益離金兵踰嶺天祚率
衛兵西遁元妃蕭氏德勒岱之姪謂德勒岱曰爾任國

政致君至此何以生為德勒岱但謝罪不能對明日天
祚怒逐德勒岱與其子穆爾薩德勒岱既去為耶律高
善努執送金兵德勒岱伺守者怠脫身亡歸復為耶律
糾堅執送秦晉國王淳時淳已僭號德勒岱自知不免
詭曰吾不能事僭竊之君不食數日卒子穆爾薩為金
兵所殺

蕭綽哈字額勒本國舅少父房之後祖阿拉終採訪使
父必拉哩以后父封趙王綽哈貌雄偉性和易年十四

尚越國公主拜駙馬都尉為祗候郎君班詳袞年十八
封蘭陵郡王時帝欲立皇孫為嗣恐無以解天下疑出
綽哈為國舅詳袞降皇后為惠妃遷于乾州初綽哈母
入朝擅取驛馬至是覺奪其封號復與妹魯姐為巫蠱
伏誅詔綽哈與公主離婚籍興聖宮流烏爾古德呼勒
部天慶中以妹復尊為太皇太妃召綽哈為南女直詳
袞遷征東副統軍時饒州渤海作亂乃與駙馬都尉蕭
罕嘉努襲其不備平之復敗敵將侯檠于川州是歲東

京叛遇敵來擊師潰獨綽哈率麾下數人力戰歿于陣
追贈龍虎衛上將軍

耶律章努字塔瑪雅季父房之後父扎拉養高不仕章
努明敏善談論大安中補牌印郎君乾統元年累遷右
中丞兼領牌印宿直事六年以直宿不謹降知內客省
事天慶四年授東北路統軍副使五年改同知咸州路
兵馬事天祚親征女直蕭呼都克為先鋒都統章努為
都監大軍渡鴨子河章努與魏國王淳妻兄蕭迪里及

其甥蕭雅里等謀立淳誘將卒三百餘人亡歸既而天
祚為女直所敗章努乃遣迪里雅里以廢立事馳報淳
淳猶豫未決會行宮使者伊遜持天祚御札至備言章
努叛命淳對使者號哭即斬迪里雅里首以獻天祚章
努見淳不從誘草寇數百攻掠上京取府庫財物至祖州
率僚屬告太祖廟云我大遼基業由太祖百戰而成今
天下土崩竊見興宗皇帝孫魏國王淳道德隆厚能理
世安民臣等欲立以主社稷會淳適好草浞大事未遂

邇來天祚惟耽樂是從不恤萬幾強敵肆侮師徒敗績
加以盜賊蜂起邦國危于累卵臣等忝預族屬世蒙恩
渥上欲安九廟之靈下欲救萬民之命乃有比舉實出
至誠冀累聖垂祐西至慶州復祀諸廟仍述所以舉兵
之意移檄州縣諸陵官僚士卒稍稍屬心時饒州渤海
及侯槩等相繼來應衆至數萬趨廣平淀其黨耶律寧
古等暴橫不法劫掠婦女財畜章努度不能制內懷悔
恨又攻上京不克北走降虜上順國女直阿古齊率

兵追敗之殺其將耶律穆魯直擒貴族二百餘人其妻
子配役繡院或散諸近侍為婢餘得脫者皆遁去章努
詐為使者欲奔女直為邏者所獲縛送行在伏誅

耶律珠展字能登裕悅博果濟之後魁偉雄辨乾統初
補祗候郎君六年因柴冊加觀察使天慶五年受詔監
都統耶律鄂爾多戰及敗左遷銀州刺史徙咸州糾將
嘗與耶律章努謀立魏國王淳及聞章努自鴨子河亡
去即引麾下數人往會之道為游兵所執送行在所上

問曰予何負卿而反珠展對曰臣誠無憾但以天下大亂已非遼有小人滿朝賢臣竄斥誠不忍見天皇帝艱難之業一旦土崩臣所以痛入骨髓而有此舉非為身計後數日復問珠展厲聲數上過惡陳社稷危亡之本遂殺之

論曰遼末同事之臣其善惡何相遠也唐古骨鯁不屈權要兩鎮烏爾古思威並著綽哈平亂渤海又以討叛力戰而死忠可尚矣德勒岱縱女直而不討寢變告而

不聞蔽主聰明為國階亂莫斯之盛也章努珠展乘時
多艱潛謀廢立將求寵幸以犯大逆其得免於天下之
戮哉

遼史卷一百

欽定四庫全書薈要卷六千二百二十六

遼史卷一百一

元中書右丞相總裁托克托等修

列傳第三十一

蕭托斯和

耶律阿息保

蕭伊蘇

蕭呼都克

蕭托斯和字伊實音圖魯卜部人四世祖音濟髮長五尺時呼為長髮音濟祖哩巴阿爾威部節度使托斯和

謹愿不妄交伯父留格坐事免官聞重元亂挈家赴行
在托斯和雖幼已如成人補筆硯小底累遷祇候郎君
轉樞密院侍御咸雍五年遷崇德宮使會有訴北南院
聽訟不直者事下托斯和悉改正之為耶律阿蘇所忌
帝欲召用輒為所沮八年歷漠北滑水馬羣太保數年
不調嘗曰用才未盡不若閑乾統中遷漠南馬羣太保
以大風傷草馬多死鞭之三百免官九年徙天齊殿宿
衛明年穀價翔踊宿衛士多不給托斯和出私廩賙之

召同知南院樞密使事天慶四年為漢人行宮副部署
時金兵初起攻陷寧江州天祚召羣臣議托斯和曰女
直國雖小其人勇而善射自執我叛人蕭哈里勢益張
我兵久不練若遇強敵稍有不利諸部離心不可制矣
為今之計莫若大發諸道兵以威壓之庶可服也北院
樞密使蕭德勤曰如托斯和之謀徒示弱耳但發滑
水以北兵足以拒之遂不用其計數月間邊兵屢北人
益不安饒州渤海結構頭下城以叛有步騎三萬餘招

之不下托斯和帥兵往討擒其渠魁斬首數千級得所掠物悉還其主及耶律章努叛托斯和與留守耶律大悲努為守禦章努既平托斯和請曰今邊兵懈弛若清暑嶺西則漢人嘯聚民心益搖臣愚以為宜罷此行不納乃命托斯和控扼東路招集散卒後以太子太傅致仕卒

耶律阿息保字達爾丹五部院人祖呼喇太祖時徙居西北部世為招討司吏阿息保慷慨有大志年十六以

才幹補內史天慶初轉樞密院侍御金人起兵城境上遣阿息保問之金人曰若歸阿蘇敢不聽命阿息保具以聞金兵陷寧江州邊兵屢敗遣阿息保與耶律章努等齎書而東冀以脅降阿息保曰臣前使依詔開諭畧無所屈將還謂臣曰若所請不遂無相見今臣請獨往不聽將行別蕭德勒岱曰不肖適異國必無生還願公善輔國家既至阿息保見執久乃遁歸及天祚敗績遷都巡捕使六年從阿蘇討耶律章努加領軍衛大將軍

阿蘇將兵而東阿息保送至軍乃還天祚怒其專鞭之
三百尋為奚六部都哩太尉後阿蘇反阿息保以偏師
進擊臨陣墜馬被擒因阿蘇有舊得免時阿蘇頗好殺
阿息保謂曰欲舉大事何以殺為由是全活者衆會阿
蘇敗乃還以戰失利囚中京數歲保大二年金兵至中
京始出獄尋為德呼勒皮室詳袞時魏王淳僭號屢遣
人以書來招阿息保封書以獻因諫曰東兵甚銳未可
輕敵及石輦驛之敗天祚奔竄召阿息保不時至疑有

貳心并怒為淳所招殺之初阿息保知國將亡前後諫甚切及死以非罪人尤惜之

蕭伊蘇字特默國舅少父房之後性謹愿壽隆間累任劇官天慶初知國舅詳袞事遷殿前副點檢金兵起為行軍副都統以戰失利罷職六年出為武定軍節度使遷西京留守明年討劇賊董龐兒戰易水西大破之以功為北府宰相加左僕射兼東北路都統十年金兵陷上京詔兼上京留守東北路統軍使為政寬猛得宜民

之窮困者輒加振恤衆咸愛之保大二年金兵大至伊
蘇軍潰左遷西南面招討使以部民流散不赴及天祚
播遷給侍從不闕拜殿前都點檢凡金兵所過諸營敗
卒復聚上京遣伊蘇為上京留守以安撫之明年盧彥
倫以城叛伊蘇被執數日以居官無過得釋後為耶律
達實所殺

蕭呼都克字哈準隱其先薩哈勒齊太祖時願隸宮分
遂為太和宮分人曾祖達魯明醫觀人形色即知其病

所在統和中宰相韓德讓貴寵達魯希旨言德讓宜賜國姓籍橫帳由是世預太醫選子孫因之入官者衆呼都克性便佞與物無忤清寧初補近侍大安元年為彰愍宮太師壽隆二年轉永興宮太師天慶初累遷至殿前副點檢五年從天祚東征為先鋒都統臨事猶豫凡隊伍皆以圍場名號之進至拉林水與金兵戰敗大軍亦却及討耶律章努以籍私奴為軍遽知北院樞密使事卒呼都克長騎射見天祚好游畋每言從禽之樂以

逢其意天祚悅而從之國政隳廢自此始云

論曰甚矣承平日久上下狃於故常之可畏也天慶之
間女直方熾惟托斯和明於料敵善於忠諫惜乎天祚
痼蔽不見信用阿息保不死阿蘇之難伊蘇甘忍盧彥
倫之執大節已失他有所長亦奚足取呼都克以游畋
逢迎天祚而隳國政可勝罪哉

遼史卷一百一

欽定四庫全書薈要卷六千二百二十七

遼史卷一百二

元中書右丞相總裁托克托等修

列傳第三十二

蕭奉先 李處溫 張琳 耶律伊都

蕭奉先天祚元妃之兄也外寬內忌因元妃為上眷倚累官樞密使封蘭陵郡王天慶二年上幸混同江釣魚故事生女直部長在千里內者皆朝行在適頭魚宴上

使諸部次第歌舞為樂至阿固達但端立直視辭以不能再三旨諭不從上密謂奉先曰阿固達跋扈若此可託以邊事誅之奉先曰彼麤人不知禮義且無大過殺之傷向化心設有異志叢爾小國亦何能為上乃止四年阿固達起兵犯寧江州東北路統軍使蕭托卜嘉戰失利上命奉先弟嗣先為都統將番漢兵往討屯出河店女直乃潛渡混同江乘我師未備來襲嗣先敗績軍將往往遁去奉先懼弟被誅乃奏東征潰軍逃罪所至

劫掠若不肆赦將嘯聚為患從之嗣先詣闕待罪止免
官而已由是士無鬪志遇敵輒潰郡縣所失日多初奉
先誣耶律伊都結駙馬蕭昱謀立其甥晉王事覺殺昱
伊都在軍中聞之懼奔女直保大二年伊都為女直監
軍引兵奄至上憂甚奉先曰伊都乃王子班之苗裔此
來實無亡遼心欲立晉王耳若以社稷計不惜一子誅
之可不戰而退遂賜晉王死中外莫不流涕人心益解
體當女直之兵未至也奉先逢迎天祚言女直雖能攻

我上京終不能遠離巢穴而一旦越三千里直擣雲中
計無所出惟請播遷夾山天祚方悟顧謂奉先曰汝父
子誤我至此殺之何益汝去母從我行恐軍心忿怒禍
必及我奉先父子慟哭而去為左右執送女直兵女直
兵斬其長子昂送奉先及次子昱於其國主道遇我兵
奪歸天祚並賜死

李處溫析津人伯父儼太康初為將作少監累官叅知
政事封漆水郡王雅與北樞密使蕭奉先友舊執政十

餘年善逢迎取媚天祚又寵任之儼卒奉先薦處溫為相處溫因奉先有援己力傾心阿附以固權位而貪污尤甚凡所接引類多小人保大初金人陷中京諸將莫能支天祚懼奔夾山兵勢日迫處溫與族弟處能子奭外假怨軍聲援結都統蕭幹謀立魏國王淳召番漢官屬詣魏王府勸進魏國王將出奭乃持赭袍衣之令百官拜舞稱賀魏王固辭不得遂稱天錫皇帝以處溫守太尉處能直樞密院奭為少府少監左企弓以下及親

舊與其事者賜官有差會魏國王病自知不起密授處
溫番漢馬步軍都元帥意將屬以後事及病亟蕭幹等
矯詔南面宰執入議獨處溫稱疾不至陰聚勇士為備
紹云奉密旨防也變魏國王卒蕭幹擁契丹兵宣言當
立王妃蕭氏為太后權主軍國事衆無敢異者幹以后
命召處溫至時方多難未欲即誅但追毀元帥劄子處
能懼及禍落髮為僧尋有永清人傳遵說隨郭藥師入
燕被擒具言處溫嘗遺易州富民趙履仁書達宋將童

貫欲挾蕭后納土歸宋后執處溫問之處溫曰臣父子
於宣宗有定策功宜世蒙宥容可使因讒獲罪后曰向
使魏國王如周公則終享親賢之名於後世誤王者皆
汝父子何功之有并數其前罪惡處溫無以對乃賜死
顓亦伏誅

張琳潘州人幼有大志壽隆末為秘書中允天祚即位
累遷戶部使頃之擢南府宰相初天祚之敗於女直也
意謂蕭奉先不知兵乃召琳付以東征事琳以舊制凡

軍國大計漢人不與辭之上不允琳奏曰前日之敗失
於輕舉若用漢兵二十萬分道進討無不克者上許其
半仍詔中京上京長春遼西四路計戶產出軍時有起
至二百軍者生業蕩散民甚苦之四路軍甫集尋復遁
去及中京陷天祚幸雲中留琳與李處溫佐魏國王淳
守南京處溫父子召琳欲立淳為帝琳曰王雖帝胄初
無上命攝政則可即真則不可處溫曰今日之事天人
所與豈可易也琳雖有難色亦勉從之淳既稱帝諸將

咸居權要琳獨守太師十日一朝平章軍國大事陽以元老尊之實則不使與政琳由是鬱悒而卒

耶律伊都一名伊都古國族之近者也慷慨尚氣義保大初歷官副都統其妻天祚文妃之妹文妃生晉王最賢國人皆屬望時蕭奉先之妹亦為天祚元妃生秦王奉先恐秦王不得立深忌伊都將潛圖之適耶律達哈拉之妻會伊都之妻於軍中奉先諷人誣伊都結駙馬蕭昱達哈拉謀立晉王尊天祚為太上皇事覺殺昱及

達哈拉妻賜文妃死伊都在軍中聞之懼不能自明被
誅即引兵千餘并骨肉軍帳叛歸女直會大霖雨道途
留阻天祚遣知奚王府蕭錫默北宰相蕭德恭大詳袞
耶律特哩袞歸州觀察使蕭和尚努四軍太師蕭幹追
捕甚急至間山及之諸將議曰蕭奉先恃寵蔑害官兵
伊都乃宗室雄才素不肯為其下若擒之則他日吾輩
皆伊都矣不如縱之還給云追襲不及伊都既入女直
為其國前鋒引羅索貝勒兵攻陷州郡不測而至天祚

聞之大驚知不能敵率衛兵入夾山伊都在女直為監
軍久不調意不自安乃假遊獵遁西夏夏人問汝來有
兵幾何伊都以二三百對夏人不納卒

論曰遼之亡也雖孽降自天亦柄國之臣有以誤之也
當天慶而後政歸后族奉先阻天祚防微之計陷晉王
非罪之誅夾山之禍已見於此矣處溫逼魏王以僭號
結宋將以賣國迹其姦佞如出一軌嗚呼天祚之所倚
毗者若此國欲不亡得乎張琳嬖嬖守位伊都反覆自

困則又何足議哉

遼史卷一百二

遼史卷一百二考證

蕭奉先傳女直乃潛渡混同江乘我師未備來襲按
來襲原文作擊之文義未明今據宏簡錄改

張琳傳 按傳所載唯云從李處溫立魏國王淳為帝
考宏簡錄琳心懷鬱悒時年已高令子弟上降表于
金詔燕京應琳田宅財物並給還之俄卒則琳又實
降金矣謹附識

遼史卷一百二考證